

Epidemia politica idiotica

S isch Mitti dryzäähundert gsi,
do het e Pescht-Epidemie
d Wält iberfalle. D Lyt sin doo
ze Dausige um s Lääbe koo.
Au z Basel het dr schwarzi Dood
vyyl Eländ brocht, und Angscht, und Noot.
E dunggli Zyt. Und in dr Nacht
hän d Peschtärzt sich an d Arbet gmacht:
Die Grangge vo de Gsunde z trenne,
isch alles gsi, wo si hän kenne:
Wie d Pescht entstoot, das blybt im Dungle -
doch glyy scho gheert me haimlig munggle:
D Juude sin schuld - denn die sin s immer!
Wäg dääne goots ys immer schlimmer!
Und s Ghaimnis gilt scho glyy als giftet:
S Wasser hän si ys vergiftet!
Me macht nit lang - es nutzt kai Bitte;
baut uf ere Rhy-Insle e Hitte,
drybt d Juude dryy, eb Frau, eb Maa -
und zindet denn die Hitte aa...

Die Gschicht isch woor - zwoor scho lang häär.
Si z glaube, fallt aim hit no schwäär.
Du mainsch, das kennt hit nimm bassiere?
Denn loos guet zue - kenntsch di "trump"-iere...

Es isch so um zwaidausig gsi.
S git wiider en Epidemie,
wo sich verbraltet, haimlig, still,
will s niemerts wirgglig woor haa will:
Denn das Mool ischs d Epidemie
vo dr politische Idiotie...
Si dringt in d Kepf yy, fluetet Länder,
und Demagoge, Schwätzer, Bländer,
hän bletzlig Uffwind, wärde gheert.
Me findets bletzlig nimm verkeert,
geege Minderhaite z hetze,
Stedt, Gebiet und Länder z bsetze,
"im Namen Gottes", und vo Allah -
und allzue vyyle duet das gfall: E "Glaube"
wird eso zem "Wisse", und alles schamloos
aabegrise, was anderscht dänggt, und s au no sait.
Hass, Misstraue macht sich brait.
Wie d Schlangekepf vo dr Medusa
schlyycht sich das Gift in d Länder uuse,
aagriehrt, ufkocht und verspritzt
vo dääne, wo s am maischte nitzt:

Trump und Putin, Erdogan,
dr Kim Jong-Un im Greessewaan,
Assad, Duterte und Mugabe -
wenn d mainsch, jetz goots nimm wyter aabe,
denn ischs no immer nit komplett,
das schregglig Horrokabinett...
Si leen sich fyyre, leen sich huldige,
und hän fir alles schnäll die Schuldige:
Aimool sin s d Moslem, denn d Migrante,
d Chrischte, d Juude, d Asylante,
Rohingya, Roma und Jeside:
Sii alli mien doo drunter lyyde,
dass e baar Wenigi, wo d Macht hän,
fir und unter sich usgmacht hän,
was isch guet und was isch schlächt -
wohäär nämme die das Rächt...?
Fir no mee Macht und no mee Gäld
dien si so, als wär die Wält
en ainzige Riise-Sindepfuul -
Brunnevergifter zwai Punggt null...

Die neyi Pescht isch Wirggligkait,
und Kai Peschtarzt wyt und brait.
S blybt d Hoffnig, irgendwo dief dinne,
dass sich die Mächtige dien bsinne,
und dass si sich nit au no traue,
scho glyy wiider Hitte z baue...